

現代生活藝術系列

華嚴經疏論纂要

— 入法界品 之五

華藏淨宗學會印贈

102

大方廣佛華嚴經疏論纂要卷第一百之二

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

入法界品第三十九 之五

○第四彌伽。寄生貴任。亦具六分。第一依教趣求。爾時善財童子。一心正念。法光明法門。深信趣入。專念於佛。不斷三寶。歎離欲性。念善知識。普照三世。憶諸大願。普救衆生。不著有爲。究竟思惟。諸法自性。悉能嚴淨一切世界。於一切佛衆會道場。心無所著。漸

次南行。至自在城求覓彌伽。

〔疏〕於中二。先念前友教。十句初總。卽前所得法門。

深信已下。皆別起觀修。文顯可知。鈔寄生貴住者。生佛法家。種性。

尊貴故。後漸次下。趣求後友。

○第二見敬諮問

乃見其人於市肆中。坐於說法師子之座。十千人衆所共圍繞。說輪字莊嚴法門。時善財童子頂禮其足。繞無量帀。於前合掌而作是言。聖者。我已先發阿耨多羅三藐三菩提心。而我未知菩薩云何學菩薩行。云何修菩薩道。云何流轉於諸有趣。常不忘失菩提。

之心。云何得平等意。堅固不動。云何獲清淨心。無能沮壞。云何生大悲力。恒不勞疲。云何入陀羅尼。普得清淨。云何發生智慧廣大光明。於一切法離諸闇障。云何具無礙解辯才之力。決了一切甚深義藏。云何得正念力。憶持一切差別法輪。云何得淨趣力。於一切趣普演諸法。云何得智慧力。於一切法悉能決定分別其義。

〔疏〕於中三。初見。次敬。後而作下諮問。於中二。先自陳發心。後而我下。正問。有十二句。初二句總。餘十句別。釋通橫豎。橫釋可知。豎配十地。一證發心故。

不退。二不誤犯故。三得禪定故。四精進故。五入俗
故。須總持。六般若現故。七權實雙行爲甚深義。得
觀察智慧地。故具足辯才。八無功用。方爲正念。九
力增上故。十智增上故。

○第三稱讚授法中。二先稱讚法器。後授已法門。
前中。二初審定。

爾時彌伽告善財言。善男子。汝已發阿耨多羅三藐
三菩提心耶。善財言。唯。我已先發阿耨多羅三藐三
菩提心。

○二敬讚於中。二先敬

彌伽遽卽下師子座。於善財所。五體投地。散金銀華。無價寶珠。及以上妙碎末栴檀。無量種衣。以覆其上。復散無量種種香華。種種供具。以爲供養。

〔疏〕所以師禮資者。以菩提心是佛因故。能廣出生諸功德故。故法界無差別論云。敬禮菩提心者。如人禮白分初月。不禮滿月。以希現故。滿月由此故。又發心畢竟二不別。如是二心先心難。是故我禮初發心。况未說法。未定爲師。後授已法。方升本座。不乖重法。前諸知識不爾者。爲僧敬俗。事不便故。

○後讚中二。先讚發心。後讚其求友。前中二。初總

讚

然後起立而稱歎言。善哉善哉善男子。乃能發阿耨多羅三藐三菩提心。

○二別讚

善男子。若有能發阿耨多羅三藐三菩提心。則爲不斷一切佛種。則爲嚴淨一切佛刹。則爲成熟一切衆生。則爲了達一切法性。則爲悟解一切業種。則爲圓滿一切諸行。則爲不斷一切大願。則如實解離貪種。性則能明見三世差別。則令信解永得堅固。則爲一切如來所持。則爲一切諸佛憶念。則與一切菩薩平

等。則爲一切賢聖讚喜。則爲一切梵王禮觀。則爲一切天主供養。則爲一切夜叉守護。則爲一切羅刹侍衛。則爲一切龍王迎接。則爲一切緊那羅王歌詠讚歎。則爲一切諸世間主稱揚慶悅。則令一切諸衆生界。悉得安隱。所謂令捨惡趣故。令出難處故。斷一切貧窮根本故。生一切天人快樂故。遇善知識親近故。聞廣大法受持故。生菩提心故。淨菩提心故。照菩薩道故。入菩薩智故。住菩薩地故。

疏於中三。初有十句。因德深廣。斯德終成。功歸初發。而汝能發。是謂希奇。其相多同。初發心品。此中

亦具深直悲心。可以意得。次則爲一切下。十王敬護。後則令一切衆生界下。外益衆生。

○第二讚求友

善男子。應知菩薩所作甚難。難出難值。見菩薩者倍更難有。菩薩爲一切衆生恃怙。生長成就。故爲一切衆生拯濟。拔諸苦難。故爲一切衆生依處。守護世間。故爲一切衆生救護。令免怖畏。故菩薩如風輪。持諸世間。不令墮落惡趣。故如大地。增長衆生善根。故如大海。福德充滿無盡。故如淨日。智慧光明普照。故如須彌。善根高出。故如明月。智光出現。故如猛將。摧伏

魔軍故。如君主。佛法城中得自在故。如猛火。燒盡衆生我愛心故。如大雲。降霍無量妙法雨故。如時雨。增長一切信根芽故。如船師。示導法海津濟處故。如橋梁。令其得度生死海故。

〔疏〕求友中。以菩薩難遇。而能求能遇。故知善財是深法器。亦預誠求友之心。故解脫處。歷十二年不生疲厭。於中二。初總讚機應難得。二菩薩爲下。別讚善友。於中二。先法。後喻。有十三喻。初二喻恃怙。次四喻拯濟。次君喻依處。餘喻救護。

○第二授已法門中二。先現通益物。令其目覩。後

升座說授。令其聽聞。今初。

彌伽如是讚歎善財。令諸菩薩皆歡喜已。從其面門。出種種光。普照三千大千世界。其中衆生遇斯光已。諸龍神等。乃至梵天。悉皆來至彌伽之所。彌伽大士。卽以方便。爲開示演說。分別解釋輪字品莊嚴法門。彼諸衆生聞此法已。皆於阿耨多羅三藐三菩提。得不退轉。

疏言輪字品莊嚴法門者。賢首引日照三藏解云。輪有多義。一約字相。楞伽中云。字輪圓滿。猶如象迹等。二約所詮。盡理圓備。如輪滿足。三約用。謂妙。

音陀羅尼。有轉授義。滅惑義。如法輪等。卽輪字教法。詮示莊嚴。此釋已住。今更依毘羅遮那經第五。別有字輪品。彼經云。是徧一切處法門。謂菩薩若住此字輪法門。始從初發妙菩提心。乃至成佛。於是中間。所有一切自利利他種種事業。皆得成就。如最初阿字。卽是菩提之心。若觀此字而與相應。卽同毘盧遮那法身之體。謂此阿上字輪。猶如孔雀尾輪光明。圍繞行者而住其中。卽是住於佛位。又阿平聲長呼。娑嚩三字。總攝三部。阿字如來部。娑字蓮華部。嚩字金剛部。隨一部中皆有五字。所

謂字輪者。從此輪轉而生諸字。輪是生義。如從阿
菩提字。卽轉生四字。謂一阿字。上聲長呼。是修行
輪。旣已發心。必修諸行。二閻字。是成菩提輪。旣修
行已。必證菩提。三嚙字。是大寂滅涅槃輪。卽菩提
所至。四惡字。長呼。是方便輪。而阿字當中。四字繞
之。從下次第右旋。亦如輪相。舉一爲例。餘字準之。
若行者如是了達。則能入陀羅尼門。旋轉無礙。故
名字輪品。種種布列圓位。故名莊嚴。餘如彼釋。其
字下深義。至衆藝中當廣分別。所以次前而辨斯
者。前無礙解脫。卽無相智光。今將入俗。兼存有無。

寄字表義。又爲總持。令不失故。旣爲醫人。亦以字輪消伏障故。聖教中生。宜持字故。

○第二升座說授

彌伽於是還升本座。告善財言。善男子。我已獲得妙音陀羅尼。能分別知三千大千世界中諸天語言。諸龍夜叉。乾闥婆。阿脩羅。迦樓羅。緊那羅。摩睺羅伽。人與非人。及諸梵天所有語言。如此三千大千世界十方無數。乃至不可說不可說世界。悉亦如是。

〔疏〕妙音陀羅尼者。標名。能分別下。顯用。此妙音持。卽前輪字法門。然字卽四十二字。音卽十四音。謂

哀阿億伊等。以十四音徧入諸字。故出字無盡。若於音窮。玆則善萬類之言。究聲名之論耳。二處互舉。理實相成。

○第四謙已推勝

善男子。我唯知此菩薩妙音陀羅尼光明法門。如諸菩薩摩訶薩能普入一切衆生種種想海。種種施設海。種種名號海。種種語言海。能普入說一切深密法句海。說一切究竟法句海。說一切所緣中有一切三世所緣法句海。說上上法句海。說差別法句海。說一切差別法句海。能普入一切世間呪術

海。一切音聲莊嚴輪。一切差別字輪際。如是功德。我
今云何能知能說。

〔疏〕推勝中二。先謙已結前。言光明者。智鑒妙音故。
後如諸下。仰推勝進。別有十四句。前四可知。五詮
深密故。六無餘說故。七法融時法故。八勝故。九勝
中勝故。次三可知。十三十四。卽前所得。而言際者。
窮理盡性故。

○第五指示後友

善男子。從此南行。有一聚落。名曰住林。彼有長者。名
曰解脫。汝詣彼問。菩薩云何修菩薩行。菩薩云何成。

菩薩行。菩薩云何集菩薩行。菩薩云何思菩薩行。爾時善財童子。以善知識故。於一切智法。深生尊重。深植淨信。深自增益。禮彌伽足。涕泗悲泣。繞無量巾。戀慕瞻仰。辭退而行。

〔疏〕住林者。方便具足住。衆德建立故。年耆德艾。事長於人。故稱長者。於其身內。現無邊佛境。定用自在。故名解脫。表此住位所修善根。皆爲度脫一切衆生。乃至令證大涅槃故。第六戀德禮辭。可知。

〔論〕彌伽速自下座。五體投地。致敬善財。言遠者。疾也。明彌伽敬能發大菩提心者。與十方諸佛同一。

體性同一智慧。同一解脫。人天所依。何得不敬。以善財先於前三善知識。已得出世菩提心。已得同於十方諸佛法身根本智。至彌伽所。學世間差別言音名字句義智。明世間俗智。敬出世間真智慧。故以明約真而有世間俗智。卽真俗自在故。故名自在。是以彌伽敬彼善財所得諸佛出世間智慧。是世間智慧根本故。是以敬之。以表俗諦差別智。敬真諦根本智。以俗智是根本智中起故。今後學者貴出世道根本智故。以根本智與一切衆生作無明生處之因果。善財初覺。彌伽敬之。十方一

切諸菩薩。恆常頂禮。初發心。以貴初覺根本智。是
出三界智慧相應。與一切諸佛智慧解脫同一體
性故。普賢行海因茲而起。是故彌伽敬之而禮。又
表無知法慢故。又此第四生貴任。明三界業謝。名
生在佛家故。第四地亦名生在佛家。與此住位。同
知同得。同見其法。依本而安立之。修學者。初生後
熟。輪字品莊嚴法門者。明於一名字法門。於一音
聲。言音無二體。名字無二性。莊嚴種種名字。以爲
助伴。而與人天六道衆生說種種法門。令生歡喜。
令得解脫。然其不離無聲一聲。無名一名。爲隨順。

衆生世間言詞故。說一切世間諸法無時。卽以無名字爲主。卽以有一切出世間法而爲莊嚴。若說無有出世間法時。卽有一切世間爲莊嚴。如是互爲主伴。互爲莊嚴。有無緣起。皆無自性。將用教化衆生。隨根開解。令得解脫。衆生及名字言音。皆無自性。以此名字圓滿清淨音聲輪。無所障礙。以一音聲。說無量名。皆以一音聲。與無量名無量字作體故。卽無量名無量字總是一字故。以聲性無體故。無量名字。與一切聲作體故。卽以名字體。自無能所分別性相故。以衆生自無性故。以此無聲之

聲。無名之名。無說之說。教化一切。無性衆生。令其
破業。至其本地。又以無依之智。無聲之聲。無名之
名。猶如虛空。徧一切六道衆生音聲。同其類音。爲
共說法。令其歡喜。然身心智慧。名字六根。總無受
者說者。然一字中。徧含多字之義。互爲主伴。然亦
各不相知。無彼無此。故是故當知。一切名字。皆以
有無二字。互爲緣起。若說一切法。有字時。卽一切
有法。自具無故。自相成壞。自有自無。自在。說一切
法。本自無。卽有法。自具。以有無自相成壞。故卽無
與有自在。以從有無無體。如法緣生。無盡名言。互

爲主伴。隨世安立。更相成壞。皆一一字中有無盡
義。猶如帝網。影像相入。若究之本源。皆幻緣有。各
無主宰。當知名不與聲作聲。聲不與名作字。智慧
本無。猶如虛空。徧一切處。等衆生界。以智體性。隨
其類音。皆令歡喜而得解脫。故名妙音。隨羅尼光
明法門。此是第四生。貴任善知識。以精進波羅密
爲體。餘九爲伴。若約智。通修五位。若約位。偏修俗
智。輪字莊嚴法門。前三善友。明出世智慧。以三比
丘表之。此彌伽及解脫長者二人。明處世間解脫
故。還以俗士表之。餘義如文自具。

○第五解脫長者。寄具足方便住。分六。初依教趣
求

爾時善財童子。思惟諸菩薩無礙解陀羅尼光明莊
嚴門。深入諸菩薩語言海門。憶念諸菩薩知一切衆
生微細方便門。觀察諸菩薩清淨心門。成就諸菩薩
善根光明門。淨治諸菩薩教化衆生門。明利諸菩薩
攝衆生智門。堅固諸菩薩廣大志樂門。任持諸菩薩
殊勝志樂門。淨治諸菩薩種種信解門。思惟諸菩薩
無量善心門。誓願堅固。心無疲厭。以諸甲冑而自莊
嚴。精進深心。不可退轉。具不壞信。其心堅固。猶如金

剛及那羅延無能壞者。守持一切善知識教於諸境界。得不壞智。普門清淨所行無礙。智光圓滿普照一切。具足諸地總持光明。了知法界種種差別無依無住平等無二。自性清淨而普莊嚴於諸所行皆得究竟。智慧清淨離諸執著。知十方差別法智無障礙。往十方差別處身不疲懈於十方差別業皆得明了。於十方差別佛無不現見於十方差別時悉得深入。清淨妙法充滿其心。普智三昧明照其心。心恒普入平等境界。如來智慧之所照觸。一切智流相續不斷。若身若心不離佛法。一切諸佛神力所加。一切如來光

明所照。成就大願。願身周徧一切刹網。一切法界普入其身。漸次遊行。十有二年。至住林城。周徧推求解脫長者。

〔疏〕於中二。先思念前教。於中亦二。初十一句。思修

前法。初總餘別。後誓願堅固下。顯修之益。鈔寄具足方便

住者帶真隨俗習無量善巧化無住故。二漸次下。趣求後友。十二年

者。昔云。自分勝進。各修六度故。亦顯徧觀十二住

故。亦表不住十二緣故。故云遊行。若不住緣。則得

解脫。故下云得見

○第二見敬諮問中三。初明見敬

既得見已。五體投地。起立合掌。白言。聖者。我今得與善知識會。是我獲得廣大善利。何以故。善知識者。難可得見。難可得聞。難可出現。難得奉事。難得親近。難得承接。難可逢值。難得共居。難令喜悅。難得隨逐。我今會遇。爲得善利。

○**疏**見敬而自慶者。希望多年故。

○二自陳發心

聖者。我已先發阿耨多羅三藐三菩提心。爲欲事一切佛故。爲欲值一切佛故。爲欲見一切佛故。爲欲觀一切佛故。爲欲知一切佛故。爲欲證一切佛平等故。

爲欲發一切佛大願故。爲欲滿一切佛大願故。爲欲具一切佛智光故。爲欲成一切佛衆行故。爲欲得一切佛神通故。爲欲具一切佛諸力故。爲欲獲一切佛無畏故。爲欲聞一切佛法故。爲欲受一切佛法故。爲欲持一切佛法故。爲欲解一切佛法故。爲欲護一切佛法故。爲欲與一切諸菩薩衆同一體故。爲欲與一切菩薩善根等無異故。爲欲圓滿一切菩薩波羅蜜故。爲欲成就一切菩薩所修行故。爲欲出生一切菩薩清淨願故。爲欲得一切諸佛菩薩威神藏故。爲欲得一切菩薩法藏無盡智慧大光明故。爲欲得一切

菩薩三昧廣大藏故。爲欲成就一切菩薩無量無數神通藏故。爲欲以大悲藏教化調伏一切衆生。皆令究竟到邊際故。爲欲顯現神變藏故。爲於一切自在藏中。悉以自心得自在故。爲欲入於清淨藏中。以一切相而莊嚴故。

〔疏〕發心中先總。後爲欲下。別陳發心之相。於中三。初欲上窮佛境。二爲欲聞一切下。欲罄盡法源。三爲欲與一切下。欲齊菩薩行。亦僧寶境。文並可知。

○三方陳請問

聖者。我今以如是心。如是意。如是樂。如是欲。如是希

求。如是思惟。如是尊重。如是方便。如是究竟。如是謙下。至聖者所。我聞聖者善能誘誨。諸菩薩衆能以方便闡明所得。示其道路。與其津梁。授其法門。令除迷倒障。拔猶豫箭。截疑惑網。照心稠林。浣心垢濁。令心潔白。使心清淨。正心諂曲。絕心生死。止心不善。解心執著。於執著處。令心解脫。於染愛處。使心動轉。令其速入一切智境。使其疾到無上法城。令住大悲。令住大慈。令入菩薩行。令修三昧門。令入證位。令觀法性。令增長力。令修習行。普於一切。其心平等。唯願聖者爲我宣說。菩薩云何學菩薩行。修菩薩道。隨所修習。

疾得清淨。疾得明了。

〔疏〕於中亦三。初結前生後。謂結前發心之相。便爲
請問之端。故云以如是心。至聖者所。二我聞聖者
下。讚能誘誨。三唯願聖者下。請說所疑。鈔謂結前
者。如前經言。爲欲入於清淨藏中。以一切相而莊
嚴。故卽爲請問。云何得入於清淨藏中等。餘皆倣
此。

○第三正示法界。分二。初入定默示。後出定言答。
今初

時解脫長者。以過去善根力。佛威神力。文殊師利童
子憶念力故。卽入菩薩三昧門。各普攝一切佛刹無

邊旋陀羅尼。入此三昧已。得清淨身。於其身中。顯現十方各十佛刹微塵數佛。及佛國土衆會道場種種光明諸莊嚴事。亦現彼佛往昔所行神通變化一切大願助道之法。諸出離行清淨莊嚴。亦見諸佛成等正覺轉妙法輪教化衆生。如是一切於其身中。悉皆顯現無所障礙。種種形相。種種次第。如本而住。不相雜亂。所謂種種國土。種種衆會。種種道場。種種嚴飾。其中諸佛現種種神力。立種種乘道。示種種願門。或於一世界處兜率宮而作佛事。或於一世界歿兜率宮而作佛事。如是或有住胎。或復誕生。或處宮中。或

復出家。或詣道場。或破魔軍。或諸天龍恭敬圍繞。或諸世王勸請說法。或轉法輪。或般涅槃。或分舍利。或起塔廟。彼諸如來於種種衆會。種種世間。種種趣生。種種家族。種種欲樂。種種業行。種種語言。種種根性。種種煩惱。隨眠習氣。諸衆生中。或處微細道場。或處廣大道場。或處一由旬量道場。或處十由旬量道場。或處不可說不可說佛刹微塵數由旬量道場。以種種神通。種種言辭。種種音聲。種種法門。種種總持門。種種辯才門。以種種聖諦海。種種無畏大師子吼。說諸衆生種種善根。種種憶念。授種種菩薩記。說種種

諸佛法。彼諸如來所有言說。善財童子悉能聽受。亦見諸佛及諸菩薩不可思議三昧神變。

〔疏〕所以此中入定示者。亦顯此位定增上故。文中三。初彰入定因緣。宿善爲因。表自修故。後二爲緣。主佛威力。表本覺故。文殊念力。顯信智故。已彰善財因文殊故。二卽入下。舉定名體。謂普攝諸刹在於身中。由唯心之智。稱性總持。令如體用。旋轉無礙。故以爲名。三入此三昧下。明定業用。卽普攝等義。於中三。初總明普攝。次種種形下。別彰廣多。三彼諸如來所有言下。令善財聞見。

○第二出定言告中四。一明起定。二告善財下。示定名體。名如來無礙莊嚴者。總有五義。一。一切如來各具一切無礙莊嚴。二。一如來互徧無礙。三。一切如來莊嚴悉入長者之身。四。長者徹見十方佛海。五。長者智持。不以爲礙。故無礙言。兼得旋持。不違上文經家所序。三善男子我入出下。明定業用。

爾時解脫長者從三昧起。告善財童子言。善男子。我已入出如來無礙莊嚴解脫門。善男子。我入出此解脫門時。卽見東方閻浮檀金光明世界。龍自在王如

來應正等覺道場衆會之所圍繞。毗盧遮那藏菩薩而爲上首。又見南方速疾力世界。普香如來應正等覺道場衆會之所圍繞。心王菩薩而爲上首。又見西方香光世界。須彌燈王如來應正等覺道場衆會之所圍繞。無礙心菩薩而爲上首。又見北方袈裟幢世界。不可壞金剛如來應正等覺道場衆會之所圍繞。金剛步勇猛菩薩而爲上首。又見東北方一切上妙寶世界。無所得境界眼如來應正等覺道場衆會之所圍繞。無所得善變化菩薩而爲上首。又見東南方香燄光音世界。香燈如來應正等覺道場衆會之所

圍繞金剛。燄慧菩薩而爲上首。又見西南方智慧日
普光明世界。法界輪幢如來。應正等覺道場衆會之
所圍繞。現一切變化幢菩薩而爲上首。又見西北方
普清淨世界。一切佛寶高勝幢如來。應正等覺道場
衆會之所圍繞。法幢王菩薩而爲上首。又見上方佛
次第出現無盡世界。無邊智慧光圓滿幢如來。應正
等覺道場衆會之所圍繞。法界門幢王菩薩而爲上
首。又見下方佛光明世界。無礙智幢如來。應正等覺
道場衆會之所圍繞。一切世間刹幢王菩薩而爲上
首。

〔疏〕上三科可知

○四彰定體相。卽無來去。唯心觀故。於中二。一結前所見。體無來往。

善男子。我見如是等十方各十佛刹微塵數如來。彼諸如來不來至此。我不往彼。

〔疏〕所以次前顯此定者。唯心之觀。亦其要故。亦顯此位知衆生界無量無邊。皆心現故。

○二廣顯隨心見佛體相。於中四。一明隨心念佛。諸佛現前。二正顯唯心念佛觀體。三以唯心觀徧該萬法。四結勸修學。令證唯心。今初

我若欲見安樂世界阿彌陀如來。隨意卽見。我若欲見栴檀世界金剛光明如來。妙香世界寶光明如來。蓮華世界寶蓮華光明如來。妙金世界寂靜光如來。妙喜世界不動如來。善住世界師子如來。鏡光明世界月覺如來。寶師子莊嚴世界毗盧遮那如來。如是。一切悉皆卽見。

〔疏〕既了境唯心。了心卽佛。故隨所念無非佛矣。何難見哉。世鈔既了境唯心者。上經云。若人欲了知。三心卽佛者。經云。如心佛亦爾。如佛衆生然。應知佛與心。體性皆無盡。既境卽是心。心卽是佛。則無境非佛。况心。心耶。加以志一不撓。精詣造微。佛應克誠于何不見。

○二正顯唯心念佛觀體

然彼如來不來至此。我身亦不往詣於彼。知一切佛及與我心。悉皆如夢。知一切佛猶如影像。自心如水。知一切佛所有色相。及以自心。悉皆如幻。知一切佛及以已心。悉皆如響。我如是知。如是憶念。所見諸佛。皆由自心。

〔疏〕初總明相無來往。

鈔今初總明無來往者。體性寂滅故。知一切下。

釋其所由。所以上言普見諸佛。又無來去。其故何

耶。了彼相虛。唯心現故。

了彼相虛。唯心現故者。以我即寂之唯心。即彼即體

之妙用。能念所念。於中前別顯後結成。別中文有

四對。意合通別。謂通顯唯心。喻無來往。別喻唯心。兼明不出入等。一如夢對。般舟三昧經云。如夢見七寶親屬歡樂。覺已追念。不知在何處。如是念佛。此喻唯心所作。卽有而空。故無來去。又云。如舍衛國有女。名曰須門。聞之心喜。夜夢從事。覺已念之。彼不來。我不往。而樂事宛然。當如是念佛。此正喻體無來往。但隨心變。般舟下引證。此經有三卷。題云般舟三昧經。一名十方現在佛。悉在前。立定經。後魏沙門支婁迦讖譯。在羅閱祇迦隣竹園說。跋陀和菩薩問第一問事品。今引亦第一卷。行品第二。佛先令遠惡近善。修此念佛三昧。故舉諸喻。示念佛相。經文浩博。今疏畧引各當具引。一喻。經云。何因緣致現在諸佛。悉在前立三昧。如是跋陀和。其有比丘。比丘尼。優婆塞。優

婆夷持戒完具。獨於一處止心。念西方阿彌陀佛。今現在隨所問。當念彼國去此千億萬佛刹。其國名須摩提。佛在衆菩薩中央說經。一切時常念阿彌陀佛。佛告跋陀和。譬如人臥。卽於夢中見有種種金銀珍寶。或復夢見父母兄弟妻子。親屬知識。相與娛樂。喜樂無比。及其覺已。爲人說之。如是跋陀和。若沙門白衣所聞。西方阿彌陀佛。當念彼佛。不得缺戒。一心專念。若一晝夜。若七日。七夜。過七日。已後見阿彌陀佛。於覺不見於夢中見之。譬如夢中所見。不知晝夜。亦不知內。亦不見外。不用在冥中。故不見。不用有所蔽礙。故不見。如是跋陀和。苦薩當如是念。時佛國界名大須彌山。其有幽冥之處。悉爲開闢。日亦不蔽。心亦不礙。是菩薩摩訶薩。不持天眼徹視。不持天耳徹聽。不持神足到其佛刹。不於是間終。不生彼間。佛刹耳。乃見便於此間坐。見阿彌陀佛。聞所說法。悉受持得。從三昧起。日。次下卽有須門女。喻二木影對中。若月滿秋空。隨水而現。澄潭皎淨。則月影圓明。水濁波騰。則光

昏影散。有水月現。曾何入來。無水影空。未曾出去。

雖水中見月。誰能執持。心之定散。準喻思擇。然其大意

佛既如影。安有育無。一多勝劣。去來入出等相。非空非有。中道觀成。若水喻心性。則佛之月影。皆是

衆生真心中物。心三如幻對。如幻非實。則心佛兩

亡。而不無幻相。則不壞心佛。正喻空有無礙。故即

無來去。不妨瞥見。見即無見。常契中道。三如幻對。但有通喻。

新經別喻云。又知自心。猶如幻術。知一切佛。如幻所作。謂有能幻法。方有幻事。無能念心。無所見佛。

疏中具顯三觀。初空觀。次而不無幻相。下。即假觀。後正喻。下。中道觀也。四如響對。以

心為緣。而佛響應。佛無分別。以佛為緣。而心見佛。

心何去來。此但總喻緣成之義。四如響對。亦唯通喻。新經別喻云。譬

如空谷。隨聲發響。悟解自心。隨念見佛。釋曰。此唯一義。則法身如空谷。自心如發聲。見佛如響應。而疏釋經通相之喻。心佛皆響。故兩句釋之。初喻佛如響。則谷等同上。後以佛為緣下。喻心如響。則以自性清淨心為空谷。佛應為聲。起見佛心。即喻響也。故疏結云。此但總喻緣成之義。然亦聲谷皆緣。喻二心為緣。而有佛響。二佛為緣。而心得見。故二皆響。而上四喻。皆言對者。雖喻有三。法本但喻於心。佛二故。上之四喻。皆具四觀。一正喻唯心。二唯心故空。三唯心故假。四唯心故中。融而無礙。即華嚴。後結成唯心。故無量壽觀經云。是心作佛。是心是佛。諸佛正徧知海。從心想生。般舟三昧經結云。自念佛從何所來。我亦無所至。我所念即見心作佛。心自見心是佛。心是我心見佛。上方攝境歸心。下又拂云。心不自知心。心不自見心。心有想為癡。

無想卽泥洹。是法無可示者。皆念所爲。設有念亦
了無所有空耳。此卽喻中。意已具矣。般舟依止觀中引文稍闕
畧。今當次第具引。經云。作是念。佛從何所來。去到
何所。自念佛何所從來。我亦無所至。自念三處。欲
處色處。無想處。是三處意所爲耳。我所念。卽見心
作佛心。自見心。是佛心。是怛薩阿竭心。此云如來。
是我身心。見佛心。不自知心。心不自見心。心有想
爲痴心。無想是泥洹。是法無可示云者。皆念所爲。
設使念爲空耳。設有念。亦了無所有。如是跋陀和
菩薩。在三昧中立者。所見如是佛。爾時頌偈言。心
者不知心。有心不見心。心起想則痴。無想是泥洹。
是法無堅固。常立在於念。以解見空者。一切無想
念。釋曰。對疏。
廣畧可知。

○第三以唯心觀。徧該萬法

善男子。當知菩薩修諸佛法。淨諸佛刹。積集妙行。調

伏衆生。發大誓願。入一切智自在遊戲不可思議解脫之門。得佛菩提現大神通徧往一切十方世界。以微細智普入諸劫。如是一切悉由自心。

〔疏〕謂非但一念佛觀。由於自心。菩薩萬行。佛果體用。亦不離心。如有偈云。諸佛從心得解脫。心者清淨名無垢。五道鮮潔不受色。有解此者成大道。

○第四結勸修學令證唯心

是故善男子。應以善法扶助自心。應以法水潤澤自心。應於境界淨治自心。應以精進堅固自心。應以忍辱坦蕩自心。應以智證潔白自心。應以智慧明利自

心應以佛自在開發自心。應以佛平等廣大自心。應以佛十力照察自心。

〔疏〕既萬法不離自心。但修自心。萬法行備。亦遣愚人妄解之失。謂有計云。萬法皆心。任之是佛。驅馳萬法。豈不唐勞。故今廣明。心雖卽佛。久翳塵勞。故以萬行增修。令其瑩徹。又但說萬行由心。不說不修爲是。又萬法卽心。修何礙心。文有十句。一如彼病人。非杖不起。煩惱病重。假善相資。二若無法水。法芽不生。三對境忘心。卽六塵不染。四舊善不雜。新善進修。可謂堅固。五違順不干。則坦然寬廓。六

寂照內證。皎然無瑕。七觸境了如。無不鑒達。八六自在。王性同於佛。開塵發用。知見分明。九與佛同。如體周法界。十以調生十力。察獲疎遺。如是修心。則圓前佛法。

○第四謙已推勝

善男子。我唯於此如來無礙莊嚴解脫門而得入出。如諸菩薩摩訶薩得無礙智。住無礙行。得常見一切佛三昧。得不住涅槃際三昧。了達三昧普門境界。於三世法悉皆平等。能善分身徧一切刹。住於諸佛平等境界。十方境界皆悉現前。智慧觀察無不明了。於

其身中。悉現一切世界成壞。而於己身及諸世界不生二想。如是妙行。而我云何能知能說。

〔疏〕不住涅槃際。生下當知。餘文相顯。

○第五指示後友

善男子。從此南行。至閻浮提畔。有一國土。名摩利伽羅。彼有比丘。名曰海幢。汝詣彼問。菩薩云何學菩薩行。修菩薩道。

〔疏〕閻浮提畔者。此洲南際。表將隣不退故。亦云所得般若。六度後邊故。摩利伽羅。晉經譯爲莊嚴。比丘海幢者。業用深廣而高出故。正心不動如海。最

高勝故

○第六戀德禮辭

時善財童子。頂禮解脫長者足。右繞觀察。稱揚讚歎。思惟戀仰。悲泣流淚。一心憶念。依善知識。事善知識。敬善知識。由善知識。見一切智。於善知識。不生違逆。於善知識。心無諂誑。於善知識。心常隨順。於善知識。起慈母想。捨離一切無益法故。於善知識。起慈父想。出生一切諸善法故。辭退而去。

〔論〕善財見解脫長者。明以真會俗。真俗自體。本性解脫也。見已五體投地。真俗無依。五位同會也。亦

明五蘊十二緣。總禪林也。合掌者。真俗會而不二也。已上以觀察禪定冥會。已下以言更申所求。已下入三昧十方各現十佛刹者。明定體徧周圍滿故。以十爲圓數也。又已下從定中所見十佛如來。及上首菩薩是三昧所現自位佛果及行故。又已下隨念而見諸佛者。以自心應真是佛故。所念皆是佛境界。更無餘也。明自心是佛。諸念總佛。餘如文自具。此是第五具足方便住。以禪波羅密爲體。餘九爲伴。若以智境之中。卽五位通修。若以約位之中。偏治真俗靜亂二障。會五蘊十二緣爲法界。

性自禪用。而無作緣生之定門。以明一切世間心境。總皆禪也。

○第六海幢寄正心在。文但有五。初念教趣求。

爾時善財童子。一心正念彼長者教。觀察彼長者教。憶念彼不思議菩薩解脫門。思惟彼不思議菩薩智。光明深入彼不思議法界門。趣向彼不思議菩薩普入門。明見彼不思議如來神變。解了彼不思議普入佛刹。分別彼不思議佛力莊嚴。思惟彼不思議菩薩三昧解脫境界分位。了達彼不思議差別世界究竟無礙。修行彼不思議菩薩堅固深心。發起彼不思議。

菩薩大願淨業。漸次南行。至閻浮提畔摩利聚落。周徧求覓海幢比丘。

〔疏〕有二。初念前教詔。鈔海幢比丘。寄正心住。成就

邪無正。故聞讚毀。眞正其心。念不動故。二趣求後友。文顯可知。

○第二見敬諮問中。二先見敬後善財童子讚言。下諮問。今初。小異前來。謂便見其入定體用。卽同前文。正示法界。下諸夜神。類多如是。文中有五。一見入定相。二覩定勝用。三瞻敬證入。四所經時分。五覩從定起。今初。

乃見其在經行地側。結加趺坐。入于三昧。離出入息。

無別思覺身安不動。

〔疏〕此通二定。一卽滅受想定。謂無別思覺。七轉已息。唯第八識持身。定前加行誓願力故。今於定身起諸業用。若圓教中。融攝法界自在無礙故。業用無方。未曾起念。是以六地能入滅定而起通用。住似地故。淨名云。不起滅定而現諸威儀。正當此也。二者卽第四禪。以起用多依彼故。四禪無出入息。亦無覺觀。內淨喜樂。諸思覺故。通表此位心定不動故。又經行地側是動之所。而滅思覺者。表卽動而寂故。而言側者。不住行故。

○二見定業用中。二先別明身分作用處別。後海幢比丘。又於其身下。總顯毛孔光明業用。今初總十四處作用不同。總相而明。從下至上。漸漸增勝。別則各表不同。一足出長者等。

從其足下。出無數百千億長者居士婆羅門衆。皆以種種諸莊嚴具莊嚴其身。悉著寶冠。頂繫明珠。普往十方一切世界。雨一切寶。一切瓔珞。一切衣服。一切飲食。如法上味。一切華。一切鬘。一切香。一切塗香。一切欲樂資生之具。於一切處救攝一切貧窮衆生。安慰一切苦惱衆生。皆令歡喜。心意清淨。成就無上菩

提之道

〔疏〕足出長者等者。足有二義。一最初故。多顯施行。萬行自故。二行住義。長者行之長故。居士得安處故。婆羅門。淨行故。成就菩提。是利行故。

○二膝出刹帝利等

從其兩膝。出無數百千億刹帝利婆羅門衆。皆悉聰慧。種種色相。種種形貌。種種衣服。上妙莊嚴。普徧十方。一切世界。愛語同事。攝諸衆生。所謂貧者令足。病者令愈。危者令安。怖者令止。有憂苦者。咸使快樂。復以方便而勸導之。皆令捨惡。安住善法。

〔疏〕利帝利等者。土由帝王。屈申自在。故行由於膝。故出淨行。次前二攝。故說變語同事。

○三腰出僊人

從其腰間。出等衆生。數無量僊人。或服草衣。或樹皮衣。皆執澡瓶。威儀寂靜。周旋往返。十方世界。於虛空中。以佛妙音。稱讚如來。演說諸法。或說清淨梵行之道。令其修習。調伏諸根。或說諸法。皆無自性。使其觀察發生智慧。或說世間言論軌則。或復開示一切智智。出要方便。令隨次第各修其業。

〔疏〕腰出僊人者。腰謂齋輪之下。氣海之間。是吐故

納新出僊之所。故梵本云。那解曼陀羅。此云齋輪。
○四脇出龍

從其兩脇。出不思議龍。不思議龍女。示現。不思議諸
龍神變。所謂雨。不思議香雲。不思議華雲。不思議鬘
雲。不思議寶蓋雲。不思議寶旛雲。不思議妙寶莊嚴
具雲。不思議大摩尼寶雲。不思議寶瓔珞雲。不思議
寶座雲。不思議寶宮殿雲。不思議寶蓮華雲。不思議
寶冠雲。不思議天身雲。不思議采女雲。悉徧虛空而
爲莊嚴。充滿一切十方世界。諸佛道場而爲供養。令
諸衆生皆生歡喜。

〔疏〕龍者是旁生故

○五於胸德相出修羅

從曾前卍字中。出無數百千億阿脩羅王。皆悉示現。不可思議自在幻力。令百世界皆大震動。一切海水自然涌沸。一切山王互相衝擊。諸天宮殿無不動搖。諸魔光明無不隱蔽。諸魔兵衆無不摧伏。普令衆生捨憍慢心。除怒害心。破煩惱山。息衆惡法。長無鬪諍。永共和善。復以幻力開悟衆生。令滅罪惡。令怖生死。令出諸趣。令離染著。令住無上菩提之心。令修一切諸菩薩行。令住一切諸波羅蜜。令入一切諸菩薩地。

令觀一切微妙法門。令知一切諸佛方便。如是所作。
周徧法界。

〔疏〕胸德相出。修羅者。胸是能生。能滅。僞慢幻術之所故。又明德相能降魔故。

○六背出二乘

從其背上。爲應以二乘而得度者。出無數百千億聲。聞獨覺。爲著我者。說無有我。爲執常者。說一切行皆悉無常。爲貪行者。說不淨觀。爲瞋行者。說慈心觀。爲癡行者。說緣起觀。爲等分行者。說與智慧相應境界法。爲樂著境界者。說無所有法。爲樂著寂靜處者。說

發大誓願。普饒益一切衆生法。如是所作。周徧法界。
〔疏〕背出二乘者。背大乘故。

○七肩出夜叉等

從其兩肩。出無數百千億諸夜叉。羅刹王。種種形貌。種種色相。或長或短。皆可怖畏。無量眷屬。而自圍繞。守護一切行善衆生。并諸賢聖菩薩衆會。若向正住。及正住者。或時現作執金剛神。守護諸佛及佛住處。或徧守護一切世間。有怖畏者。令得安隱。有疾病者。令得除差。有苦惱者。令得免離。有過惡者。令其厭悔。有灾橫者。令其息滅。如是利益一切衆生。皆悉令其。

捨生死輪。轉正法輪。

〔疏〕肩出夜叉等者。肩是可畏勇力之所故。又是荷負之所故。爲守護業。

○八腹出緊那羅等

從其腹出無數百千億緊那羅王。各有無數緊那羅女。前後圍繞。又出無數百千億乾闥婆王。各有無數乾闥婆女。前後圍繞。各奏無數百千天樂。歌詠讚歎。諸法實性。歌詠讚歎。一切諸佛。歌詠讚歎。發菩提心。歌詠讚歎。修菩薩行。歌詠讚歎。一切諸佛。成正覺門。歌詠讚歎。一切諸佛。轉法輪門。歌詠讚歎。一切諸佛。

現神變門。開示演說一切諸佛般涅槃門。開示演說
守護一切諸佛教門。開示演說令一切衆生皆歡喜
門。開示演說嚴淨一切諸佛刹門。開示演說顯示一
切微妙法門。開示演說捨離一切諸障礙門。開示演
說發生一切諸善根門。如是周徧十方世界。

疏腹出緊那羅等者。鼓腹弦歌。音樂之所故。

○九面門出輪王

從其面門。出無數百千億轉輪聖王。七寶具足。四兵
圍繞。放大捨光。雨無量寶。諸貧乏者。悉使充足。令其
永斷不與取行。端正采女。無數百千。悉以捨施。心無

所著。令其永斷邪姪之行。令生慈心。不斷生命。令其究竟常真實語。不作虛誑無益談說。令攝他語不行。離間。令柔輒語。無有麤惡。令常演說甚深。決定明了之義。不作無義綺飾言辭。爲說少欲。令除貪愛心。無瑕垢。爲說大悲。令除忿怒。意得清淨。爲說實義。令其觀察一切諸法。深入因緣。善明諦理。拔邪見刺。破疑惑山。一切障礙。悉皆除滅。如是所作。充滿法界。

○疏輪王者。布十善。令向佛法故。鈔布十善下。經文自具。細尋可知。

○十日出日輪

從其兩目。出無數百千億日輪。普照一切諸大地獄。

及諸惡趣皆令離苦。又照一切世界中間令除黑闇。又照一切十方衆生皆令捨離愚癡翳障。於垢濁國土放清淨光。白銀國土放黃金色光。黃金國土放白銀色光。瑠璃國土放玻瓈色光。玻瓈國土放瑠璃色光。碑磔國土放碼碯色光。碼碯國土放碑磔色光。帝青國土放日藏摩尼王色光。日藏摩尼王國土放帝青色光。赤真珠國土放月光網藏摩尼王色光。月光網藏摩尼王國土放赤真珠色光。一寶所成國土放種種寶色光。種種寶所成國土放一寶色光。照諸衆生心之稠林。辦諸衆生無量事業。嚴飾一切世間境。

界。令諸衆生心得清涼。生大歡喜。如是所作。充滿法界。

〔疏〕日出日輪。日等日照。故

○十一 眉間出帝釋

從其眉間白毫相中。出無數百千億帝釋。皆於境界而得自在。摩尼寶珠繫其頂上。光照一切諸天宮殿。震動一切須彌山王。覺悟一切諸天大衆。歎福德力。說智慧力。生其樂力。持其志力。淨其念力。堅其所發。菩提心力。讚樂見佛。令除世欲。讚樂聞法。令厭世境。讚樂觀智。令絕世染。止脩羅戰。斷煩惱諍。滅怖死心。

發降魔願。興立正法。須彌山王。成辦衆生一切事業。如是所作。周徧法界。

〔疏〕眷間出帝釋者。於地居中。最尊勝故。中道般若化衆生故。令離五欲。得淨法故。

○十二額出梵王

從其額上。出無數百千億梵天色。相端嚴。世間無比。威儀寂靜。言音美妙。勸佛說法。歎佛功德。今諸菩薩悉皆歡喜。能辦衆生無量事業。普徧一切十方世界。

〔疏〕額出梵王者。梵超欲故。次於眷上。又是稽顙請法之所故。

○十三頭出菩薩

從其頭上。出無量佛刹微塵數諸菩薩衆。悉以相好莊嚴其身。放無邊光說種種行。所謂讚歎布施。令捨慳貪。得衆妙寶。莊嚴世界。稱揚讚歎持戒功德。令諸衆生永斷諸惡。住於菩薩大慈悲戒。說一切有悉皆如夢。說諸欲樂。無有滋味。令諸衆生離煩惱縛。說忍辱力。令於諸法心得自在。讚金色身。令諸衆生離瞋恚垢。起對治。行絕畜生道。歎精進行。令其遠離世間放逸。皆悉勤修無量妙法。又爲讚歎禪波羅蜜。令其一切心得自在。又爲演說般若波羅蜜。開示正見。令

諸衆生樂自在。智拔諸見毒。又爲演說隨順世間種種所作。令諸衆生雖離生死。而於諸趣自在受生。又爲示現神通變化。說壽命自在。令諸衆生發大誓願。又爲演說成就總持力。出生大願力。淨治三昧力。自在受生力。又爲演說種種諸智。所謂普知衆生諸根智。普知一切心行智。普知如來十力智。普知諸佛自在智。如是所作。周徧法界。

〔疏〕頭出菩薩者。最上首故。說十度行。並顯可知。

○十四頂出佛

從其頂上。出無數百千億如來身。其身無等。諸相隨

好清淨莊嚴。威光赫奕如真金山。無量光明普照十方。出妙音聲充滿法界。示現無量大神通力。爲一切世間普雨法雨。

〔疏〕頂出佛者。尊極無上故。文中三初總顯所出身語之相。次所謂下。別彰法雨不同。後如是下一句。

總結

所謂爲坐菩提道場諸菩薩。雨普知平等法雨。爲灌頂位諸菩薩。雨入普門法雨。爲法王子位諸菩薩。雨普莊嚴法雨。爲童子位諸菩薩。雨堅固山法雨。爲不退位諸菩薩。雨海藏法雨。爲成就正心位諸菩薩。雨

普境界法雨。爲方便具足位諸菩薩。雨自性門法雨。
爲生貴位諸菩薩。雨隨順世間法雨。爲修行位諸菩
薩。雨普悲愍法雨。爲新學諸菩薩。雨積集藏法雨。爲
初發心諸菩薩。雨攝衆生法雨。爲信解諸菩薩。雨無
盡境界普現前法雨。

〔疏〕就別彰法雨中。總有三十二種。前十二法雨爲
菩薩。餘爲雜類。今初一。普知平等法雨者。畧有三
等。一。始覺同本。無始本之異故。二。等諸佛故。三生
佛一性故。得此三等。則轉成妙覺。二。普門法雨者。
下十法雨。卽十住者。圓教位中十住位滿。便成佛。

故。此。前。更。無。別。位。此。約。以。位。攝。位。非。一。乘。宗。餘。無。此。說。然。此。十。法。皆。是。勸。學。十。法。已。任。自。分。勸。進。勝。故。普。門。卽。三。世。等。十。種。智。慧。勸。彼。灌。頂。令。其。進。修。下。皆。做。此。三。令。普。學。法。王。善。巧。等。爲。莊。嚴。故。四。令。學。知。利。動。利。等。皆。無。能。壞。最。高。出。故。五。令。學。說。一。卽。多。說。多。卽。一。等。十。種。廣。大。深。法。故。名。海。藏。六。令。學。一。切。法。無。相。無。體。等。旣。一。切。皆。然。名。普。境。界。七。知。衆。生。無。邊。乃。至。知。衆。生。無。自。性。皆。是。自。性。門。以。無。邊。等。亦。如。自。性。故。八。了。知。圓。滿。三。世。佛。法。皆。是。隨。順。世。間。故。九。徧。觀。察。衆。生。界。等。爲。悲。愍。故。十。誦。

習多聞虛閑寂靜近善知識等皆爲積集包藏於
 法行故。創治心地故名新學。十一令其勤供養佛。
 主導世間爲攝衆生。若作十地等釋。類可思準。十
 二卽十信菩薩。令普緣如來。及普賢無盡境界而
 生信心。分明現前。進入位故。鈔十法雨卽十
住者。尋經易了
 爲色界諸衆生。雨普門法雨。爲諸梵天。雨普藏法雨。
 爲諸自在天。雨生力法雨。爲諸魔衆。雨心幢法雨。爲
 諸化樂天。雨淨念法雨。爲諸兜率天。雨生意法雨。爲
 諸夜摩天。雨歡喜法雨。爲諸忉利天。雨疾莊嚴虛空
 界法雨。爲諸夜叉王。雨歡喜法雨。爲諸乾闥婆王。雨

金剛輪法雨。爲諸阿脩羅王。雨大境界法雨。爲諸迦
樓羅王。雨無邊光明法雨。爲諸緊那羅王。雨一切世
間殊勝智法雨。爲諸人王。雨無樂著法雨。爲諸龍王。
雨歡喜幢法雨。爲諸摩睺羅伽王。雨大休息法雨。爲
諸地獄衆生。雨正念莊嚴法雨。爲諸畜生。雨智慧藏
法雨。爲閻羅王界衆生。雨無畏法雨。爲諸厄難處衆
生。雨普安慰法雨。悉令得入賢聖衆會。如是所作。充
滿法界。

〔疏〕後爲色界下二十法雨。普爲人天雜類。一總爲
色界衆生捨外住內。令得心境無礙。故曰普門。二

偏語初禪。以宿習多慈。而偏已眷屬。今令慈普。含
福無窮。三卽他化自在天。轉世自在。生十力自在。
四就他化中。分出魔衆。魔好摧他自高。今令得慈
心法幢。摧其邪慢。五隨念化樂。但汗自心。故轉令
淨念。六雖於世樂知足。宜生出世之意。七世樂時
分稱快。不及法喜之歡。八地居之極。美空居爲勝。
不及福智。嚴法性空。九夜叉性多暴害。故令歡喜
於舍生。此約對治明喜。前夜摩天約隨便宜。十以
彼善奏樂音。上德聲聞亦爲摧壞。今令得金剛智
無所不摧。無不圓滿。十一彼時大身而生。憍慢。令

見法身。稱法界境。十二彼以淨眼觀海。意欲吞龍。令以慈眼智光。徧照機感。十三隨彼善歌。令得卽空。涉有殊勝世智。十四人王著樂。故徧對治。十五龍多恚毒。故爲說喜。有熱沙等怖。說法幢能摧。十六鱗多毒害。又爲蟲啖食無休。故說內休毒心。外苦休息。十七地獄衆生。身受無邊苦。心念無邊惡。若以正念三寶爲嚴。則頓脫衆苦。十八畜生多癡。故十九炎魔鬼卒。互相怖畏。乃至王身。亦有熱鐵。鎔銅等怖。故二十諸難者。所謂八難。及在人間。獄囚繫閉等。而多不安。故普安慰。悉令得入賢聖衆。

會。翻彼難處。後結周徧。稱性用故。

○二總顯毛孔光明業用

海幢比丘。又於其身一切毛孔。一一皆出阿僧祇佛刹微塵數光明網。一光明網具阿僧祇色相。阿僧祇莊嚴。阿僧祇境界。阿僧祇事業。充滿十方一切法界。

疏可知。

上來見定相用竟

○第三瞻敬證入

爾時善財童子。一心觀察海幢比丘。深生渴仰。憶念彼三昧解脫思惟。彼不思議菩薩三昧。思惟彼不思

議利益衆生方便海。思惟彼不思議無作用普莊嚴門。思惟彼莊嚴法界清淨智。思惟彼受佛加持智。思惟彼出生菩薩自在力。思惟彼堅固菩薩大願力。思惟彼增廣菩薩諸行力。

〔疏〕證入中十句。初句思人。證人法界。餘句思法。證法法界。於中初一句總。謂三昧是體。解脫是用。體用合明。二別思彼體。次二句別思彼用。一益生廣多。二無思普徧。卽用而寂故。次二句思前體用所因。一內智淨故。二外緣加故。後三句思其勝進。依前體用。進益後三故。

○第四所經時分

如是住立。思惟觀察。經一日一夜。乃至經於七日七夜。半月一月。乃至六月。復經六日。

〔疏〕六月六日者。第六住中。滿第六度故。以法味資神。故身心都忘。不覺時久。

○第五明出定

過此已後。海幢比丘從三昧出。

〔疏〕出定者。所作訖故。先見敬竟。

○第二正明諮問中二。先讚。後問。今初。

善財童子讚言。聖者。希有奇特。如此三昧。最爲甚深。

如此三昧最爲廣大。如此三昧境界無量。如此三昧神力難思。如此三昧光明無等。如此三昧莊嚴無數。如此三昧威力難制。如此三昧境界平等。如此三昧普照十方。如此三昧利益無限。以能除滅一切衆生無量苦故。所謂能令一切衆生離貧苦故。出地獄故。免畜生故。閉諸難門故。開人天道故。令人天衆生喜樂故。令其愛樂禪境界故。能令增長有爲樂故。能爲顯示出有樂故。能爲引發菩提心故。能使增長福智行故。能令增長大悲心故。能令生起大願力故。能令明了菩薩道故。能使莊嚴究竟智故。能令趣入大乘。

境故能令照了普賢行故能令證得諸菩薩地智光明故能令成就一切菩薩諸願行故能令安住一切智智境界中故

〔疏〕分二。初標讚深勝。後以能除滅下。出讚所因。由具此下諸因。故上云甚深廣大等。其中云能令增長有爲樂者。不捨有爲故。出有樂者。不染有故。又上句爲凡夫。次句爲二乘。下云引發菩提。卽爲大器。

○第二正問。有二問答。先問名。後問用。初中先問。後答。

聖者。此三昧者。名爲何等。海幢比丘言。善男子。此三昧名普眼捨得。又名般若波羅蜜境界清淨光明。又名普莊嚴清淨門。善男子。我以修習般若波羅蜜故。得此普莊嚴清淨三昧等。百萬阿僧祇三昧。

疏上旣修入。何更問名。其猶世人得大王饌。雖餐勝味。何必知名。答有三名者。初一從智立。次一雙就境智。後一雙融境智立。名普眼捨得者。般若之智照一切法。故名普眼。皆無所得。故云捨得。若有所得。不能卽寂。而用以無所得。卽無所不得。菩薩無得心。無罣礙。諸佛無得。則得菩提。昔云障無不

寂曰捨理無不證曰得。非無此理而未造玄。二合稱中。般若清淨故。境界清淨。清淨之境。皆般若若境故。三雙融立稱者。般若了境。無境非般若。何所不嚴。故智論云。說智及智處。俱名爲般若。是則若般若清淨。若境清淨。無二無二分。無別無斷故。故一莊嚴。一切莊嚴。名普莊嚴。及攝眷屬。可知。

○二向境界中先問後答

善財童子言。聖者。此三昧境界。究竟唯如是耶。海幢言。善男子。入此三昧時。了知一切世界無所障礙。往詣一切世界無所障礙。超過一切世界無所障礙。莊

嚴一切世界無所障礙。修治一切世界無所障礙。嚴
淨一切世界無所障礙。見一切佛無所障礙。觀一切
佛廣大威德無所障礙。知一切佛自在神力無所障
礙。證一切佛諸廣大力量無所障礙。入一切佛諸功德
海無所障礙。受一切佛無量妙法無所障礙。入一切
佛法中修習妙行無所障礙。證一切佛轉法輪平等
智無所障礙。入一切諸佛衆會道場海無所障礙。觀
十方佛法無所障礙。大悲攝受十方衆生無所障礙。
常起大慈充滿十方無所障礙。見十方佛心無厭足
無所障礙。入一切衆生海無所障礙。知一切衆生根

海無所障礙。知一切衆生諸根差別。智無所障礙。

〔疏〕問云。唯如是者。上所目覩。頗已修入視聽之外。更希異聞。後答中。皆是上來之所不及。於中三。初六句。明於器世間無礙。次見一切佛。下十句。於智正覺世間無礙。後大悲攝受。下六句。於衆生世間無礙。其中見佛。亦爲攝生故。文竝可知。

○第三謙已推勝

善男子。我唯知此一般。若波羅蜜三昧光明。如諸菩薩。入智慧海。淨法境界。達一切趣。徧無量刹。總持自在。三昧清淨。神通廣大。辯才無盡。善說諸地。爲衆生

依而我何能知其妙行。辯其功德。了其所行。明其境界。究其願力。入其要門。達其所證。說其道分。住其三昧。見其心境。得其所。有平等智慧。

〔疏〕謙已推勝中。初謙已知一。後如諸下。推勝中二。先舉彼所知。後而我下。顯不能測。

○第四指示後友

善男子。從此南行。有一住處。名曰海潮。彼有園林。名普莊嚴。於其園中有優婆夷。名曰休捨。汝往彼問。菩薩云。何學菩薩行。修菩薩道。

〔疏〕處名海潮者。但言有處。則猶是前國。顯方便行。

不離般若故。言海潮者。謂潮所至處。顯方便就機。不過限故。亦將入生。成海以濟物故。能知三世佛法海故。故上法門。名爲海藏。園名普莊嚴者。約相。廣有衆嚴故。約表。以生。成爲園苑。萬行爲莊嚴故。又文義相隨等。莊嚴總持無漏法故。友名休捨者。此云意樂。亦云希望。亦云滿願。謂隨衆生意樂。希望得圓滿故。亦能圓滿性相法故。前般若了真。故寄比丘。此以慈心方便入俗。故寄優婆夷矣。妙顯方便

行不離般若者。既了俗由。證真。故說後得。明不離也。

時善財童子於海幢比丘所得堅固身。獲妙法財入。

深境界。智慧明徹。三昧照耀。住清淨解。見甚深法。其心安住。諸清淨門。智慧光明。充滿十方。心生歡喜。踊躍無量。五體投地。頂禮其足。繞無量而恭敬瞻仰。思惟觀察。咨嗟戀慕。持其名號。想其容止。念其音聲。思其三昧。及彼大願所行境界。受其智慧清淨光明。辭退而行。

〔論〕經行地。側結跏趺坐。入於三昧。表寂用自在。以經行地是用。三昧是寂。表依用有寂。地側者。表不住寂用之中。而任運自在故。離出入息。明稱理而寂。稱理而用。性自徧周。非同二乘作寂滅證也。此

同十地中第六地也。以十地行。依此十住行樣。修行至彼。同此本故。是故第六地菩薩。得寂滅定神通現前。此是隨空慧寂用門。十地大悲寂用。

華山比丘道虛刊刻
華嚴經入法界品疏論纂要第一百之
二卷伏願具文殊之大智修普賢之妙
行參禮知識於刹刹塵塵轉正法輪於
在在處處上報四恩溥資萬有
康熙二十二年六月 華藏室謹題

大方廣佛華嚴經疏論纂要卷第一百之二